

## FRÉTTIR

## Heilbrigðisráðherra á í viðræðum við heilsugæslulækna

## Útilokar ekki breytingar á skipulagi heilsugæslunnar

JÓN Kristjánsson heilbrigðisráðherra segist ekki útiloka að gera einhverjar breytingar á skipulagi heilsugæslunnar, en þær breytingar verði þá að vera á forsendum heilsugæslunnar þannig að þjónustan verði áfram skipulögð sem nærþjónusta og á sama verði. Heimilislæknar hafa krafist þess að þeir fái að opna stofur og að Tryggingastofnun semji við þá, en Jón segist ekki vera tilbúinn til að gefa grænt ljós á slíka breytingu.

Heilsugæslulæknar á Suðurnesjum hafa sagt upp störfum vegna óánægju með þá ákvörðun kjaranefndar að lækna eigi ekki rétt á sérstökum greiðslum vegna útgáfu heilbrigðisvottorða. Jón sagðist gera ráð fyrir að lesa mætti út úr þessum uppsögnum óánægju með þetta vottorðamál. Heilbrigðisráðu-

neytið gæti hins vegar ekki tekið ákvörðun í þessu máli. Það væri kjaranefndar að gera það, en formaður nefndarinnar hefði lýst því yfir að von væri á úrskurði í þessum mánuði.


„Ég hef margsinnis lýst því yfir að þó að útgáfa vottorðanna gangi til heilsugæslustöðvanna en ekki til þeirra beint eigi þeir ekki að gjalda þess í launum. Kjaranefnd hefur verið að skoða þetta mál, en það hefur tekið allan tíma.“

Heilsugæslulæknar hafa sett fram kröfur um að þeim verði heimilað að setja upp stofur og að við þá verði samið með sama hætti og sérfræðilækna.

„Ég er opin fyrir því að ræða við heilsugæslulækna um að þeir komi að rekstri heilugæslustöðva með þjónustusamningum eða útboði.

Peir hafa hins vegar viljað gera út stofur á sama hátt og sjálfstætt starfandi sérfræðingar og semja við Tryggingastofnun. Ég hef ekki samþykkt slíka breytingu. Ef það yrði gert yrði að gera það á forsendum heilsugæslunnar. Við höfum viljað skipuleggja hana sem grunnþjónustu eftir hverfum. Við viljum að heilsugæslan sé öllum aðgengileg og á sama á verði. Ég hef ekki útilokað breytingar en eigi að síður höfum við ekki gefið grænt ljós á þetta. Við erum að skoða allar þessar leiðir.“ sagði Jón og bætti við að forystumenn heimilislækna hefðu rætt við embættismenn í ráðuneytinu um þessi mál í gær.

„Ég vona að við náum sameiginlegri niðurstöðu um þessi mál og ekki komi til átaka innan heilsugæslunnar.“ sagði Jón.



Morgunblaðið/Ásdís

## Líf og list á Kjarvalsstöðum

ÞESSU skemmtilega sjónarhorni náði ljósmyndari Morgunblaðsins á leið sinni um ganga Kjarvalsstaða, en þar stendur yfir 30 ára afmælisýning Myndhöggvarafélagsins í Reykjavík. Örn Egilsson öryggisvörður tyllti sér á stól við hlíð

höggmyndar eftir Þorbjörgu Pálsdóttur, eins stofnenda félagsins, sem nú sýnir verk sín ásamt Ásmundi Ásmundssyni. Það er öllu léttara yfir Erni heldur en styttni, sem er í þungum þönkum. Enda nefnist verkið Þunglyndi.

## Persónuvernd úrskurðar RÚV í vil

## Heimilt að samkeyra þjóðskrá og viðskiptamannaskrá

PERSONUVERND hefur úrskurðað að Ríkisútvarpinu sé heimilt að samkeyra eigin viðskiptamannaskrár yfir eigendur viðtækja við upplýsingar sem fengnar eru úr þjóðskrá Hagstofu Íslands.

Þetta gerði Persónuvernd í framhaldi af tölvubréfi þar sem óskað var álits stofnunarinnar á þessu máli. Bréfitari sagði að svo virtist sem RÚV bæri saman þjóðskrá og viðskiptamannaskrá til að bera saman hverjir væru með sjónvarp og hverjir ekki. Spurt var hvort það væri ekki skýrt brot á lögum um persónuvernd að þjóðskráin væri nýtt í viðskiptalegum tilgangi.

Í svari RÚV segir að á afnotadeild RÚV sé lögð sú lagaskylda að kanna og fylgjast með hvort allir þeir sem nota viðtæki greiði af því lögboðið afnotagjald. Ofangreind vinnsla sé nauðsynleg til að fullnægja þeirri lagaskyldu. Byggt sé m.a. á ákvæði í lögum um persónuvernd sem heimili vinnslu persónuupplýsinga ef hún sé nauðsynleg til að uppfylla lagaskyldu sem hvíli á viðkomandi ábyrgðaraðila.

Fram kemur að RÚV framkvæmir umrædda vinnslu með þeim hætti að eftir samtengingu viðskiptamannaskrár við þjóðskrá er tilteknum einstaklingum send fyrirspurn um tækjaeign þeirra og þar með um gjaldskyldu. Komi í ljós að viðkom-

andi er ekki gjaldskyldur er nafn hans afmáð en ella bætt á viðskiptamannaskrá.

Í úrskurði Persónuverndar segir að RÚV hafi heimild til þeirrar vinnslu persónuupplýsinga sem fyrirnefnd vinnsla felur í sér og er fallist á að vinnslan sé nauðsynleg til að full-

nægja lagaskyldu stofnunarinnar og við meðferð opinbers valds.

Páll Hreinsson, prófessor og formaður Persónuverndar, Valtýr Sigurðsson héraðsdómari, Haraldur Briem sóttvarnalæknir og Óskar B. Hauksson verkfræðingur kváðu upp úrskurðinn.

## Engin aukning á salmonellusýkingum í fólki

ENGIN aukning hefur orðið á salmonellusýkingum á Íslandi á síðustu misserum. Sigurður Örn Hansson aðstoðaryfirdýralæknir segir því ekkert benda til að salmonellusmit, sem greinst hefur í svinabúum, hafi borist í fólk sem neytt hefur svinakjöts.

Sigurður Örn sagði að salmonella hefði greinst á níu svinabúum frá því að þessi baktería fór fyrst að greinast en það var fyrri hluta sumars í fyrra. Enn hefði ekki tekist að losna við hana á sex búum. Sigurður Örn vildi ekki svara því hvaða bú þetta væru eða hvort tveir stærstu framleiðend-

urnir, sem eru með um 70% markaðarins, væru í þessum hóp.

Sigurður Örn sagði að orsakir þessa smits hefðu ekki fundist. Salmonellubaktería væri í umhverfinu og hún gæti hafa borist þaðan. Grunur hefði beinst að fóðrinu vegna þess að smitið hefði komið upp á búunum á svipuðum tíma. Hann sagði að það væri búið að rannsaka fóðrið en ekkert hefði fundist í því. Þessi kenning, að orsökina mætti rekja til fóðursins, væri því ekki staðfest.

Sigurður Örn sagði að viðamiklar aðgerðir væru í gangi á svinabúunum við að reyna að uppræta þetta smit. Stöðug vöktun væri í sláturhúsunum. Sýni sem tekin hefðu verið úr skrokkum í sláturhúsunum hefðu reynt jákvæð, en kjöt af þessum skrokkum fengi ekki að fara á markað nema hafa farið í gegnum suðu fyrst, þ.e. vinnslu. Hann sagði að markmið dýralæknisembættisins væri í fyrsta lagi að mengað kjöt færi ekki á markað og í öðru lagi að uppræta smitið á búunum. Þótt gripið hefði verið til margvíslegra aðgerða í þeim tilgangi að koma í veg fyrir að smitað kjöt færi á markað væri ekki hægt að fullyrða að salmonellusmitað kjöt hefði ekki farið á markað.

Sigurður Örn sagði að nauðsynlegt væri fyrir almenning að virða þær almennu leiðbeiningar sem settar hefðu verið fram um meðhöndlun á kjöti, þ.e. að gegnumsteikja kjötið og passa að ekki ætti sér stað krossmengun.

Sjöfn Sigurgísladóttir, hjá matvælasviði Hollustuverndar ríkisins, tjáði Morgunblaðinu að nú stæði yfir rannsókn á svinakjöti á vegum stofnunarinnar og heilbrigðiseftitsembættta landsins. Henni myndi ljúka um miðjan maí og þá yrðu niðurstöður kynntar úr þeim 100 sýnum sem tekin

yrðu. Kæmi fram salmonella í sýnum yrði það hins vegar tilkynnt strax.

Guðni Ágústsson landbúnaðarráðherra segir að ráðuneytið muni fylgjast náið með rannsókn embættis yfirdýralæknis og Hollustuverndar á upptökum salmonellusýkingar í svinabúum á suðvesturhorni landsins að undanförunu. Um leiðindamál sé að ræða.

Guðni segir að sænskur sérfræðingur sé væntanlegur til landsins til að aðstoða starfsbræður sína við að finna ástæðuna fyrir viðvarandi sýkingu í umræddum svinabúum. Grunur hafi beinst að fóðri en ekkert fundist enn í því sem bendi til sýkingar þaðan. „Við höfum ráðið vel við þetta í gegnum tíðina en nú eru menn alveg strand,“ segir landbúnaðarráðherra.

## Skýrsla vegna Gunna RE 51

## Veður of slæmt og stöðugleika ábótavant

SJÓSLYSANEFND telur ástæðu þess að eikarbáturinn Gunni RE 51 fórst á siglingu vestur af Akranesi í febrúar 2000, vera þá að haldið var í róður við slæm veðurskilyrði og að stöðugleika bátsins var ábótavant. Einn maður fórst með bátinum en skipstjórinn komst um borð í björgunarbát og var bjargað af þyrlu Landhelgisgæslunnar.

Breytingar voru gerðar á bátinum árið 1995 og fór hallaprófun fram að því loknu. Búnaði var síðar bætt við en Siglingastofnun Íslands gerði engar athugasemdir í haffærisskýrteini.

Í skýrslu sjóslysanefndar segir að ítarleg rannsókn á bátinum fyrir og eftir breytingar og samanburður á sýsturskipum, leiði í ljós að tölur um þyngd hans, sem lagðar voru til grundvallar stöðugleikamati, fengist ekki staðist. Þyngdarpunktur bátsins var mun aftar og 3-4 sentimetrum ofar en niðurstæða hallapróf-

unar árið 1995 gaf til kynna. Búnaður sem settur var um borð síðar hafi síðan fært þyngdarpunktinn upp um nálægt 2 sentimetra. Stöðugleiki bátsins í hallaprófun var því ofmetinn, þyngd bátsins talsvert meiri en reiknað var með, þyngdarpunktur reiknaður of framarlega og of neðarlega. Þá voru veiðarfæri á þilfari mun þyngri í reynd en stöðugleikagögn gerðu ráð fyrir eða tæplega 1,8 tonn í stað 0,7 tonna. Ólíufantar voru ekki fullir og enginn ís í lest en gögn gera ráð fyrir 0,5 tonnum af ís. Þegar báturinn lagði úr höfn að morgni 14. febrúar 2000 stóðst stöðugleiki hans því engan veginn kröfur.

## Varað var við stormi

Þann dag hafði Veðurstofa Íslands varað við stormi á miðunum sem báturinn var stefnt á. Í niðurstöðum skýrslunnar segir að sjóferðinni hafi verið haldið áfram þótt sjólag færi versnandi eftir því sem utar dró.

## FERMINGARGJÖFIN

## Ný ensk orðabók

með hraðvirku uppflettkerfi



Ný og endurbætt ensk-íslensk/íslensk-ensk orðabók með hraðvirku uppflettkerfi er komin út.

Bókin hefur að geyma 72.000 uppflettorð og var sérstaklega hugað að fjölgun orða í tengslum við tækni, vísindi, tölvur, viðskipti og ferðalög.

Hún spannar því fjöldamörg svið og nýttist vel hvort sem er á heimili, vinnustað, í skóla eða bara hvar sem er.

Orðabókin er 932 bls. í stóru broti og innbundin í sterk band.

Kynningarverð: 7.800 kr.



ORDABÓKAÚTGÁFAN